

Thamani ya Kondoo Aliyepotea

Hili ndilo pendo, si kwamba sisi tulimpenda Mungu, bali kwamba yeye alitupenda sisi—1 Yohana 4:10.

Mafarisayo walisema kwamba ikiwa Yesu angekuwa nabii wa kweli, angepatana nao, na kutangaza amri na kanuni zao, na kuwatendea watoza ushuru na wenye dhambi kama wao walivyowatendea. Katika kumtoa Mwanawe kufa kwa ajili ya dhambi za ulimwengu, Bwana Mungu alidhihirisha kile ambacho kilikuwa thamani Aliyoweka juu ya wanadamu; kwa kuwa katika kumtoa Yesu kwa ulimwengu, alitoa zawadi bora zaidi ya mbinguni. Kwa ajili ya dhabihu hii ya gharama kubwa shukrani kubwa zaidi inadaiwa kutoka kwa kila nafsi. Bila kujali ni taifa, kabila, au lugha gani, akiwa mtu mweupe au mweusi, bado ana sura ya Mungu, na “somo sahihi la binadamu kujifunza ni mwanadamu,” akizingatiwa kutokana na ukweli kwamba amenunuliwa kwa damu ya Yesu. Kuonesha dharau kwa, kudhihirisha chuki dhidi ya taifa fulani, ni kudhihirisha tabia ya Shetani.

Mungu ameweka thamani Yake juu ya mwanadamu katika kumtoa Yesu kwa maisha ya fedheha, umaskini, na kujitoa kafara, kutwezwa, kukataliwa, na kifo, ili kwamba mwanadamu, kondoo Wake aliyepotea, aweze kuokolewa. Je, basi ni jambo la ajabu kwamba mbingu zote zinapendezwa na fidia ya mwanadamu? Je, ni jambo la ajabu kwamba elfu kumi mara elfu kumi, na maelfu ya maelfu ya malaika wamepewa kazi katika kupanda na kushuka kwenye ngazi ya ajabu ili kuwahudumia wale ambao watakuwa warithi wa wokovu? Malaika hawaji duniani ili kushutumu na kuharibu, kutawala na kutafuta heshima, bali ni wajumbe wa rehema ili kushirikiana na Kapteni wa jeshi la Bwana, kushirikiana na mawakala wa kibinadamu ambao watatoka kwenda kutafuta na kuokoa kondoo waliopotea. Malaika wanaagizwa kupiga kambi kuwazunguka wale wanaomcha na kumpenda Mungu.

Huruma ya mbingu yote imetolewa kwa ajili ya kondoo wanaotangatanga mbali na zizi. Ikiwa Mafarisayo wangekuwa wakifanya kazi kwa kupatana na Mungu, badala ya kuungana na adui wa Mungu na mwanadamu, hawangeonekana wakiwadharau wale walionunuliwa kwa damu ya Yesu. Madanganyo ya Shetani yanapokuwa yamevunjwa kutoka kwenye akili ya mwanadamu, mwenye dhambi anapoangalia Kalvari, na kuona dhabihu ya gharama kubwa ambayo imetolewa ili kuokoa jamii iliyoasi na kuharibiwa, anatafakari na kuguswa sana na upendo wa Mungu, na anatubu. “Hili ndilo pendo, si kwamba sisi tulimpenda Mungu, bali kwamba yeye alitupenda sisi.”

Laiti, kama tungeweza kuuelewa upendo wa Mungu, na hata kwa kiasi kidogo ili tuelewe huruma ambayo imedhihirishwa kwa mwanadamu aliyeanguka. Tunawezaje kutazama na kuishi! Kwa kumtazama Kristo mwanadamu anabadilika na kubadilishwa katika tabia toka utukufu hata utukufu. Unaingia kwenye pambano kati ya nuru na giza. Mtazame maskini mwenye dhambi, anayewakilishwa na kondoo aliyepotea ambaye mchungaji anamtafuta, angalia msalabani! ... Katika yule maskini kipofu aliyerudishiwa uwezo wa kuona na Mchungaji mwenye huruma alikuwa ni yule ambaye Mafarisayo waliojikinai walimwona kuwa anastahili tu ... kuchukiwa (*The Signs of the Times*, Novemba 20, 1893).